

Minister Hooyboer-Winklaar:

Un beyesa di scol den curason di San Nicolas



ORANJESTAD- Colegio San Augustin MAVO ta un scol secundario conoci pa su bon resultadonan. A pesar di e condicion fisico malo cu e scol tabata aden, e experiencia cu e scol ta uno hopi bon y den e ultimo añanan por a tende e nomber di e scol y diferente estudiante resona durante di celebracion di e miho graduadonan di Aruba.

Pa mas cu 70 aña di existencia di Colegio San Augustin, nunca e scol a wordo renoba. Pa hopi aña su edificionan tabata den un condicion no optimal pa duna y tuma les. E falta di bon mantencion y renobacion tabata tin efectonan grandi riba e infraestructura di e scol. Pero, tur

cos a cambia na maart 2015, ora cu porfin a logra pone tur planificacion y financiamiento riba un liña y a cuminsa cu e renobacion y expansion cu e scol aki tanto tabatin mester di dje.

E compania Van Kessel a gana e destaho publico, bou di guia y supervision di DOW, ta yegando den su fase final. Un proyecto total di mas o menos 3.2 milyon florin cu a wordo financia door di FDA. E renobacion ta conta cu un cantidad nobo di espacio pa ambos e alumno y docentenan por ehersce nan necesidadnan durante cu nan ta na scol.

Recientemente, Minister di Enseñansa Michelle Hooyboer-Winklaar a bishita Colegio San Augustin pa mira

e progreso di e trabaonan andando. El a observa cu tabatin partinan di e edificionan cu a wordo basha abao, y mester a cuminsa for di e fundeshi, pero e resultadonan ta papia pa nan mes. E renobacion y expansion di



Colegio San Augustin ta progresando asina lihe y ta bayendo asina bon cu e docente y alumnonan, hunto cu e personal di sosten lo por cera e aña escolar actual den nan propio edificionan.

“E scol no ta cla ainda, pero e diferencia ya ta asina visibel. Cu kantoor y klas lokaal adicional, bibliotheek y cuarto di computer completamente nobo. Mi no por warda pa wak e cara di e estudiante y e docentenan riba e prome dia cu nan cuminsa scol bek den nan propio edificio”, e mandatario a bisa.

Ainda e fecha exacto cu e scol ta keda cla no ta confirma, pero ta premira cu esaki lo

tuma luga di e proximo lunanan nos dilanti. Un beyesa di scol den curason di San Nicolas, tanto den resultado di su alumnonan y awo tambe fisicamente, Colegio San Augustin ta un di e elementonan cu ta contribui na e sentimentonan di e orguyo den su distrito.

Minister Hooyboer-Winklaar ta sumamente contento cu e progreso di e MAVO mas bishita na San Nicolas, y cu e por ta parti di e proceso di mehoracion di e parti fisico di e scol cu a pone nan stempel di calidad den enseñansa na Aruba. E mandatario a bisa cu e lo bishita e scol algun biaha mas den e proximo lunanan. □

